

Siswa USIM juara pidato



Mohd Ikhwan bersama dengan **Derrick** meraikan kejayaan muncul juara PABM 2013

Putrajaya: Percubaan kali kedua Mohd Ikhwan Roselli, mahasiswa Fakulti Syariah dan Undang-undang (FSU) Universiti Sains Islam Malaysia (USIM) di pentas Pidato Antarabangsa Bahasa Melayu (PABM) Piala Perdana Menteri 2013 berhasil apabila dinobatkan sebagai Johan PABM kategori Nusantara.

Dalam Pertandingan Akhir PABM 2013 yang berlangsung di Dewan Plenari, Pusat Konvensyen Antarabangsa Putrajaya (PICC), penyampaian pidato bertenaga Mohd Ikhwan berjaya menambat hati juri profesional dan memukau khalayak dewan sekali gus menewaskan dua pemida-

to lain dari Indonesia dan Brunei Darussalam.

Kejayaan itu melayakkan Mohd Ikhwan menerima Piala Perdana Menteri, wang tunai RM21,700, piala iringan, sijil penghargaan dan buku-buku terbitan Dewan Bahasa dan Pustaka yang disampaikan Menteri Pengajian Tinggi, Datuk Seri Mohamed Khaled Nordin.

Kejayaan manis itu turut dikongsi Naib Canselor USIM, Prof Datuk Dr Asma Ismail, yang hadir memberi sokongan moral kepada Mohd Ikhwan.

Sokongan padu

Mohd Ikhwan yang bakatnya mula dikesan Pengurusan Kelab Debat USIM ketika

bergelar pelajar Tamhidi (Matrikulasi) menyifatkan pencapaian itu adalah kejayaan paling gemilang sepanjang menceburi arena pidato IPT.

"Alhamdulillah, syukur pada Allah SWT dan keluarga yang sentiasa memberi sokongan penuh dalam bidang yang saya minati ini. Insyallah, wang tunai ini akan saya gunakan untuk menunaikan umrah bersama keluarga dan untuk simpanan masa depan," katanya.

Sementara itu, kategori Antarabangsa pula menyaksikan Derrick Fernando Jaramillo atau nama jolokannya 'Mat Derih' dari Panama yang menyampaikan pidato bertajuk 'Malaysia Di Hatiku'.